

Pablotenipa Corosadenidsa ima teppe dosse quinajaro Colosenses

Odsa panani Corosapi Epeso huajira tanidsa odsa panani tojajaro. Pablopa Epesohuaji madidsa Jesocristo tahimari mari icanabaqqijari. Nahi Corosacca madija ojaría, oni Epafra, Pablocca marinaja mittadsa Jesodsa jehe najari, quinahi nade. Dsotode pocca odsahuaji toc-canidsa pohuana Corosacca madija mari icanabaqqijari, quinahi nade. Nadsapa madija mota huapi taha Jesodsa jehe quinajari.

Pablopa Corosahuajicca Jesodsa jehe quinajarideni maride tocca-jararaha poccadeni ima mittadsa pohuadenidsa ajijaro ima teppe dosse inajaro. Aja mamaridedeni ohuaha Corosacca madija mari icanabaqqidsa pajissacca ima jeraraha mari mari quinajari. Poccadeni marinajadsa madija iboraqqiri nahijine disseraqqiri najari. —Icca marinajadsana ticassiejeranijine —quinajari. Nadsapa Pablo najaro ima mittadsa pohuadenidsa ajijaro ima teppe dsodo inajaro.

Pocca dsodonijipi: Cristopa huapima inahatoridsajari. Pohuana huapimadsa deni tojajari. Pohuadsara pajissa inadsapi icassiejeranitohui. Madie dsati naqui icajinitohui. Corosadenipa Dio jipa tahiccara inanamananijine pohuadenidsa dsodo inajaro.

Pablo, Timoteo tedseje nija quinajari

¹ ¿Nija imecotedeni? Ohuapi Pablo. Dio jipa tadsa Jesocristocca dodosse ojararo. Ohuemecote Timoteo tedseje tiadenidsa dsodo inajaro. ² Ajijaro imapi nani odsa

panani Corosahuaji Diocca tiquejenajarodenidsa dsodo inajaro. Tiadenipi imecotedeni. Jesocristodsa disser-aqquri tiquinajaro. Icca Abi Dio tiadenidsa ima bicani inananijine, inajaro. Dio pocca jonehe naqui tiadenidsa inananijine, inajaro.

Pablopa Diocca toquejenajaridenitohui Diodsa huati huati tajari

³ Iapi huajjiradsa titohuideni Diodsa huati huati ihinanajaro. Ia Medsede Jesocristocca Abi Diodsa huati huati inadsapi etti ajima ihinanajaro: —Jehe Abi Dio, Corosahuaji madimanajaridenicca ima bica tadsapi Tiadsa etidseni —ihinanajaro Diodsa. ⁴ Aji tiadenipi Jesocristodsa jehe tidsanapomanani quinahi ima imittani. Aja Diocca toquejenajarideni huapimadsa naqui tetideni huanaqquri nani quinahi ima imittani. ⁵ Nema tiquinajaropi itedsejemacca ima bicani iadsa tojanitohui naha-toqquri tiquinajaro. Aji: —Iapi memehuaji imadinitohui —tiquinajarojinea Diocca toquejenajaridenidsa tetideni huanaqquri najaropaji. Pajissacca ima aji Jesocristo tahi-mari icassiejeranijinecca tiadeni mari tocanabaqquipod-sama Jesocristopa memehuaji pocca madijadsa ima bicani inanajorajaro timittamanajaropaji. Nadsapi najaro imatohui timadimanajaro. ⁶ Ajjaro Jesocristo tahimaripi pina tiadeni mari tocanabaqquijarissa najaria dsama onihi oni-hidsa madiridsamanajarideni mittaridsamanadsapa Jesocristodsa toquejenajaripaja. Nadsapi ima bicani inaridsamanajaro. Tiadeni naqui najarossa tiquinajaro. Dio titohuideni huati huana tahi ima timittamanadsapi pocca tohuati huanehedsa pajissa tiquinajarode. Nadsapi tiadeni naqui ima bicani tinanaridsamanajaropaji.

⁷ Imecote bicabote Epafra pohana Jesocristo tahi-mari tiadeni mari tocanabaqquijaride. Pohua naco Jesocristocca dodosse tojajari, iadsama dsepe ijijari.

Epafrapa Jesocristodsa dissera tadsapa tiadeni tonahattabaqquihijine dsepe ihiji najaride. ⁸ Epafra pohuana titahimarideni iadsa huati nanidsa imittajarode. Tiadenipi Jesocristocca toquejenajaridenidsa tetideni huanaquiri nani naqui imittade. Dio Corimejine Cristocca tohuati huanehema tetideni cahanari canajaropaji.

⁹ Nadsapi titahimarideni imittaponidsama titohuideni Diodsa huatide inebo-jerajaropaji. Dio Pohua jipa tahicca nahatoquiri tiquinanissa tanijine inadsa Pohuadsa huati huati ihidsanapo najaro. Tiadenidsa Pohua Corimecca nahatohue, pocca tohuattehe huapima da inanijine inadsa Pohuadsa huati huati ihidsanapo najaro. ¹⁰ Jehe, Dio Corimecca tohuattehe ticajimanadsapi timadimananissa tanijine nahatoquiri tiquinanitohui. Pina ia Medsede jipa tahicassa tinanamananijine. Ima bicanira tinamanadsapi ia Medsede huatidsehitohui. Tijinedeni ima bicani tojaridsadsapi tidsepedeni ijie huapima ahuato tanitohui. Pina ahua bono ocassa tahicca bonojide rajarissa tiquinanitohui. Nema tiquinadsapi Diodsa denima tinoccodeni tojidsera-dsanaponijine inadsa Pohuadsa huati huati ihidsanapo najaro.

¹¹ Diocca dacorehepi deni tojanicca. Najaro dacorehema tiadeni tonadacorabaqquihini nahijine inadsa Pohuadsa huati huati ihidsanapo najaro. Nani ima ocassera tanicca tiadenidsa anidsapi dacoco tijiradsa mohuaradsa tinahanamananijine. ¹² Tetidsemanadsa naqui tettideni Diodsa: —Abi Dio, epejeni, tijine bica tani —titiquina nanijine inadsa Pohuadsa huati huati ihidsanapo najaro. Diopa ia tonapajira-baqquihissa tadsa Pohua dsamari memehuaji ia tonamadi-baqquihitohui. Huapima pocca iquejenaropipi aji Pohuajine ibodi ssiaja tajaropaji. Najaro aji pocca daniji bicani iadsa inanajarajaropaji. Nidsa

Pohua madihihuaji Pohua ssiejenedsa bacco inadsapi iadsa da inanitohui, inajaro. ¹³ Dsidsinidsa imadipodsapi imasiri iadsa dacorapode. Naraha Dio ia joca toninebaquidsa pocca ejedenicca cacahuehedsa ia tonanabaquijaride. Diopa Pohua Bedidsa huati huana tajari. ¹⁴ Pohua Bedi Jeso dsoqquejarijine icassiejerajaro. Icca imasirijine iadsa najidsohue ssonarinitohuiraha pohuajine jicanissa tadsapi Diopa iadsa: —Epeje, ticcadeni imasiri ohuati ajimani —najaripaja.

Jesocristo dsoqquejarijinea Dio tedseje icajonerajaropaji

¹⁵ Cristopa Dio Bedi. Pina Dio Pihuassa najari. Diopa inoccodsa qqui inajarahi. Naraha Dio Pohua Bedi Jesocristo qqui qqui tojaripapa pina Dio Pohua qqui inajarissa najari. Cristopa nami nahato-geraccadsama madipojari. Aja huapima cajiridsajaripa dsotode inahatoridsajari. ¹⁶ Diojine Pohua Bedina huapima inahatoridsajari. Aja memehuaji aniridsajari inahato, aja namidsa aniridsajari inahato najari. Aja inoccodsa qqui inaridsajari huapima inahato, aja inoccodsa qqui inajarajari naco huapima inahato najari. Aja inoccodsa qqui inajarajaridenicca taminedeni naco inahatobaquid-ridsajari. Cacahuehe cajimana, dacorehe cajimana, nahatohue cajimana najarideni huapima pihuana pohuadeni nahatodedeni tojaripapa. Huapimapa pocca. ¹⁷ Cristopa dsama nahato-geraccadsama madipojari. Aja huapima aniridsamanajaripapa pohuajine nahatoridsajari. Memecca, namicca huapimapa pihuana ecahuadsa aniridsahissa tajari. ¹⁸ Aja Cristopa pihuadsa ijariquijaro ia Dossede. Pihuapa pina itatissa najari. Iapi pohua assiressa inajaro. Pihuapa nadsama madipojari. Pihuana dsoqquehedsa tahide nahatonijari. Najaroa aji nahatoniecca ima pohuajine iadsa najorajaropaji. Nani pohua natti jaijamissanijine.

Pohuana ima huapimadsa deni tojajari. ¹⁹ Dio Pohua jipa tadsa pocca nahatohue nemanehē, pocca deni tojehe nemanehē, pocca dacorehe nemanehē huapimapi Jesocristodsana anijaro. ²⁰ Diopa memehua jicca, nami-huajicca animanaridsajari huapima Pohua tedseje cajon-erahijine jipa tajari. Nama nadsapa Pohua Bedi Cristo icadossejari, huapima inajonebaqquihijine. Cristopa ahua porimacossanidsa dsoqquedsapa pohua emene toccajari. Najarojinea icca imasiri jicadsapi Dio tedseje icajonera-jaropaji.

²¹ Tahidepi Diodsa jidsaqquri tiquinaccade. Tibodidenidsa Diodsa jiperaqquri tiquinaccade. Tabacorehe tinanamanajarohne Diocca huadi tiquejenaccade. ²² Naraha jidapapi Jesocristohne Diodsa tijonemanajaro. Aja Jesocristopa pohua assire pina essiressa najarodsa dsoqquehijine ocasserani ahujari. Nama najaria aja nidsa pohua Imehi Diohuaji ia tohuaccamacossani-baqquidsapa Imehidsa: —Ajaridenipa occa madija —nahitohui iadsa. Nahi Dio ia qqui tabaqquidsapa imasiri jirehe ibodi ssiajaqquri nehe ia qqui tabaqquihijine. Dio iadsa naco: —Tabaccoraqquri tiquinani —najarahitohui. Jesohne iadsa ima nohuereje najaro. ²³ Nema tiquinanijinepi Jesodsa paji jehe tidsanapomanarini naji. Aji pohua tahimari icassiejeranijinecca timittamanapojaro naqui tinebomana tejeraji. —Jesocristohne icassiejeradsapi Diodsa bacco inadsa etidsenitohui —titidsanapomana naji. Nadsama pohua tahimari huati huati onajarona dsama huapimadsa ecomeraridsadsa tojaridsa-jaropaji. Ohua Pablo naqui Jeso ohua cadossedsa pohua tahimari maride ojaridsajaropajide.

Pablopa Dio icadossedsa Jesocristodsa quequeriqquimana najarideni cacahuade tojajari

Corosadenidsa 1:246Corosadenidsa 1:29

²⁴ Tiadenidsa ohuati huana tadsa Dio Atti denima timit-tamananijine onadsa ocasserani ohuaraha ohuatidsejaro. Cristopa pohuadsa ojariqquimanahijine ocasserani ahujaripajade. Pohuadsa toquejenajaridenipa pina pohua assiressa quinajari. Ohua naqui pohuadsa toquejenajarideni acco ocamabaqquidsa ocasserani ohujaropaji. Nema onajaropi ohua ocasserani ohujaro, aja Jeso ocasserani ahujaricca tadsajani tassaqquidsapi pohuadsa ojariqquimanajarideni denima tobicamandasanapohuitohui. ²⁵ Aja Dio ohua cadossejaripa aji Jesocristodsa tijariqquimanajarocca ima toccanissa tanijine cacahuade ojararopaji. Najaroa aji Dio Atti nemanehe onapajiranissa tadsa tiadeni mari ocanabaqquijaropaji. ²⁶ Najaro imapi tahide icca ididenidsama Djojine aniporaha pohuadenidsapi ahuatora taccade. Naraha jidapapi Dio pocca madija bicaquuri najaridenidsa ahuateo inanajaropaji. ²⁷ Dio Pohua tohuini nadsa pohuadenidsa ahuateo inanajaropi jodio quejena-jarajarideni naco pocca daniji bicani cajimanahitohui. Najaro imapi najoraporaha Djojine ahuateo tejeraccade. Aji Diocca ima bicanipi Pohua Bedi Jesocristo tibodidenidsa tojaridsajaripaja. Najarijinena nidsa tinahatonimanadsapi bica tanidsa timadimananitohui. Diocca deni tojehe naqui tiadenidsa tojanitohui.

²⁸ Ajijaro ima Jesocristo tahimaripi iana eccoraridsajaro. Dio iadsa tohuattehe inanadsa madija huapima bodideni acco acco ihicamabaqqui najari. Dio ia tonahatabaqquidsa naqui mari mari ihicanaridsabaqqui najari. Nadsapa nidsa aja mari icanabaqquijarideni huapimapa memehuaji Dio Pohua baccohuaji domo huadsapa aja Jesocristojine imarideni pajiranissa tani Dio qqui inabaqquihitohui. ²⁹ Najarotohui odsepe ijijaro. Ohuadsa najo taraha dissera onajaro. Cristo pocca dacorehema

ohua tonadacoradsapi odsepe ijidsanapojaro.

2

¹ Nahatoqquiri tiquinanijine tiadenidsa dsodo onajaro. Aji tiadenidsa Diocca ima bicani tojanijine odsepe iji-jaropi ohuadsa najo taraha nema nehe dissera onajaro. Titohuideni, aji odsa panani Laodiseahuaji madimanajari-denitohui naqui, aja madija huapima ohua qqui toquina-jaraccajaridenitohui naqui dissera onajaro. ² Dio tibodideni tonahatidsebaquihijine, pocca tohuati huanehema tibodideni ojariqquinissa tanijine naqui tohuini onajaro. Diocca ima bicani ahuatora taporaha jidapapi ahuateo tajaro timittamananissa tanijine naqui dissera onajaro. Najaro ima bicanipi Cristona paja. Puhuadsa tinoccodeni tojidsera-dsanapodsapi puhuadsa pajissa tiquinanissa tanijine titohuideni Diodsa huatide dissera onajaro. ³ Cristodsapi tohuattehe huapima anijaro. Nahatohue onihi onihi naqui puhuadsa anijaro. Aji tohuattehe bicanipi, nahatohue onihi onihi naqui pina todsepetaji huatini ccara tanicassa nani, ihinanajaro. Imittanijine bica tani. ⁴ Tiadenidsa nema onajaropi madija ohuahadeni tiadeni tocamidsabaqqui-manarana. Attideni bica tadsa huati huati toquinaraha maidsamanajari. ⁵ Ohuapi tiadenidsa omadi-jeraraha obodidsa jidseraqqiri tiquinadsapi pina tiadenidsa omadijarossa najaro. Najaroa aji timadimananissa tanicca ima omittadsapi ohuatidsejaro. Aji Jesocristodsas jehe tidsanapomanani dacorani omittadsa naqui ohuatidsejarode.

Cristopa iadsa camittehe dsati da inajaro

⁶ Ia Medsede Jesocristo tahimari timittamanapodsapi puhuadsa jehe tiquinajarode. Nema tiquinadsapi puhuadsara timadimananissa dsanapoji. ⁷ Puhuadsa tidisseramanani dsanapona. Pina ahua jabo nami bodihuaji

toccabacquidsapa assire huahi dacorajarissa tiquinaji. Jেসদসা তিযাৰদেনি দেনিমা নাপিডসানাৰুনা. অজিযাৰো মারিনাযা পাজিষসাকা তিাদেনি মারি তুচানাৰাৰুই-মানাযাৰিষসা তিনানাৰানাযি, তিচাদেনি জেহেনিযি দাচুৰানিযিনে. হুাজিযি-ৰাদসা ডিউদসা নাযুই: —জেহে, এপেজেনি. তিযিনে বিচা তানি —তিতিযুইনা নাজি.

⁸ পাজি, মাদিযা ইমা পুনিমাকা হুতি তুযুইনাযি চাজি তাহি. পুহুডাউনিপা পুচাদেনি ইমাদসা জেহে তিযুইনানিযিনে তিউহুইদেনি যুইনাযি. নাৰাহা অতিউদেনিডসা জেহে তিযুইনেজাৰাজি, ওনাযাৰো. পুচাদেনি ইমাপি পিনা পাজিষসাসা নাৰাহা মাইদসেহে. পুচাদেনি ইমা হুাপিমাপি পিনা জেসুৰিষ্টো তাহি-মারি ইচাষিযেৰানিযিনেচচাষা নেজাৰেনি. পুচাদেনি ইমাপি পিনা ইডিউদেনিচা ইমা পুনিমাকা হুাৰিযুনাযাৰুচাষা নাজাৰো. পুহুডাউনিপা অজিযাৰো নাৰিচাচা দাচুৰেহে চাজিমানাদসা: —অজিমা তিনানাৰানাৰুদসাপি ইমা বিচানি বাচুচু তিযুইনানিউহুই —যুইযুইনানাৰাহা মাইদসামানাযাৰি.

⁹ ক্ৰিষ্টোপা মাদিযাষা নাৰাহা ডিউচা হুাপিমা পুহুডাসা অনিযাৰো. ডিউচা দাচুৰেহে, নাহাতুহুে, দেনি তুজেহে, বিযুেহে হুাপিমা চাজিযাৰি. ¹⁰ নামা নাদসাপা ক্ৰিষ্টুনা হুাপিমাদসা দেনি তুজাযাৰি. অযা তুচুৰিমে তামিনেদেনি দাচুৰেহে চাজিমানাৰাহা ক্ৰিষ্টুনা নাজাৰিউদেনিডসা দেনি তুজাযাৰি. নাদসামা তিাদেনি ক্ৰিষ্টুচা তিযুেজেনাযাৰুপি পুহুডাসা তিপিযাৰিমানানিষসা তানি. পুহুডা চাজিযাৰি হুাপিমা নাযুই তিচাদেনি. ¹¹ ক্ৰিষ্টুচা তিযুেজেনাদসাপি পুহুডাজিনে তিচাদেনি ইমাসিৰি জেউ তেহে জিচাযাৰো. নাজাৰুপি পিনা হুইষিনাজাকা ইমাসা নাজাৰো. জুডিউদেনিপা ডিউচা মাদিযা তুযুেজেনাহিযিনে হুইষিনাজা চাচাজিমানা নাজাৰি. নাজাৰুপি অষিৰেউদেনিডসাৰা অহুাতু তাজাৰো নাৰাহা তিাদেনিপি তিউডিউদেনিনা ক্ৰিষ্টুজিনে তুহুইৰেজাৰুনা পাজি. ¹² নাদসামা তুতুপা তিচাজিমানাযাৰুপি পিনা ক্ৰিষ্টু তেদসেজে পুপি তিডসামানাযাৰুচাষা নাজাৰো. ডিউ পুচা দাচুৰেহেদসা ক্ৰিষ্টু ইনাহাতুনিযাৰিউদসা পাজিষসা তিযুইনাদসাপি ক্ৰিষ্টু পুহুডা তেদসেজে তিনাহাতুনিমানাযাৰুচাষা তিযুইনাজাৰো. ¹³ তাহিডে তিউডিউদেনিচা ইমাসিৰিমা তিমাডি-

manapodsapi pina tecotajarossa naccade. Diocca madija tiquejena-jeraccade. Naraha jidapapi Diojine pina Cristo tedseje tinahatonimanajarossa tiquinadsapi camittehe dsati ticajimanajaropaji. Cristojine Dio icca imasiridsa: —Epeje, ohuati ajimani —najari. ¹⁴ Aji tahide Diocca dossenijidsa iboqquri inajaropi pina Diodsa cuenta ica-jijjarossa, pina Dio debe inajarissa najaro. Icca ibohue manaconipi Dio ia tonajidso-baqquihitohuiraha aja Jesocristo ahua porimacossanidsa coba idsanamanadsapa Diojine icca ibohue manaconi inajicajaro. Pina ahua porimacossanidsa coba idsanajarossa najaropaji. ¹⁵ Cristo ahua porimacossanidsa dsoqquedsapa Diojine tocorime taminedenicca dacorehe, poccadeni deni tojehe huapima inassamoridsajaropaji. Dio Pohuajine najarideni ajamani toquejenahi huapimadsa ahuato inanajaro. Pina jadsiredsa ajamani toquejenajarideni todsepe toquejenajarissa quinajari.

Ajjaro namidsa madimanajaridenicca marinaja tohuini tiquinejeraji

¹⁶ Jesocristo deni tojajaridsa tiquejenajaro. Nadsapa madija marinaja tahidecca ecahuamanajarodeni tiadenidsa atti atti quinadsa: —Poni, imitta-jerana —tiquinaji. Aji tijipamananiccadsa, dse tiquinaniccadsa atti atti quinadsa timittamana-jeraji. Poccadeni marinaja tecahuamana-jeradsa pina poccadeni ejete jipaqqiecca, abadsico dsaticca, jassinajacca huada najarodsa tiadenidsa atti atti quinaraha pohuadeni atti-deni timittamana-jeraji. ¹⁷ Nadsama najaro poccadeni marinaja maittaccadsama jodiodenidsa tojapojaropi corimani. Pina madija ccajonadsa majijine corime qqui inapodsapi dsotodena assire ccajonahi nahato inajarossa najaro. Najaro marinajapi jodiodenidsa Dio huati tadsa Jesocristotohui najoramajari. Nidsa dsotodena Jesocristo

pajissa assire ccajonajari. ¹⁸ Madija ohuahadeni naco tiadenidsa attidenipa: —Ssamoqquiri tiquinani. Jesojine ticassiejera-jeranitohui. Icca imana bica tani —quiquina-naraha: —Poni, imitta-jerana —tiquinaji. Paji, Diocca daniji bicani ticajimana-jerarana. Madija nama quinajari-denipa mamaisadedeni. Pohuadenipa pohuadeni ajamani tonanamanaraha dsotodepa: —Nahatoqquiri inani —quinajari. Poccadeni ima onihi naqui Diocca dodosse tabaqquidenidsa huahuatidsemana najari. Poccadeni ima onihi naqui caji tani. —Ibodi huatodsa inoccodsa qqui ina tahi, pina icca huadadsa qqui inajarissa naha qqui ina tahi. Najarodsa tohuattehe onihi onihi iatta tani —quiquinanajari. Naraha aja pohuadenipa madijacca marinajadsara bodideni huatomanajarijine attideni: —Iapi deni iquejenani —quiquinanaraha pohuadeni atipi pajissa jerani. ¹⁹ Pohuadenipa Cristodsa quejenajarahi. Naraha iana Cristodsa ijariqquidsapi pohuapa pina itatissa najari. Pohuana ijariqquinicca ia Dossede. Iapi pohua assiressa inajaro. Nadsama essirepi itone, essicone najaro tassaqquidsapi essire dacorajaro. Ojari nehe tojajaro. Jijipajine nanapi najaro. Najarossa najaro Cristo pohuadsa itassaqquidsapi daco ijirajaro. Cristo pohua attima, pocca dacorehema ihinapi najaro. Nema inanipi Dio Pohua jipa tajarissa inanajaro.

²⁰ Nadsama aji Cristocca tiquejenajaropi Cristo dsoqquedsapa tiadeni naqui pina Cristo pohua dsoqquejarissa tiquinajaropaji. Jidapapi ajijaro namicca tiquejena-jerani. Nadsapi ajijaro namidsa dacorehe cajimanajaridenicca marinajapi tiadenidsa nohuerajaropaji. Naraha ¿nejecotohui ticcadeni ima pina ajijaro namidsa madimanajaridenicca marinaja tecahuamanajarossa najaro? Najaropi tinebomanaji.

²¹ Ajijaro namidsa madimanajaridenicca marinaja

onih i onih i najaropi pina: —Ajajari banipa oppina tahi, paji, dama tiquinejeraji —quiquinanajari. —Ajajari dsamatapa naco oppina tahi, paji, tijipamana tejeraji —quiquinanajari. —Oppina tahiicca tidsepe tajodsa naco oppina tahi. Paji, ticcadeni ima tossamorana —quiquinanajari. ²² Naraha oppina tahi quiquinanajaricca pina bani, pina dsamatapa, nama nahicca huapimapa jicaca tahi. Najaro marinajapi madijacca marinaja. ²³ Poccadeni marinaja imittadsapi: —Jehe, nahatoquiri najari —ina tani. Aja attidenipa: —Ajijaro marinaja ecahuadsapi icca ima Diodsa pajiranissa taniijine —quiquinanajari. Pohuadenipa pohuadeni ajamani tonanamanadsa: —Iapi dacorehe icappirani. Ssamoquiri inani —quiquinanajari. Pohuadeni pohuadenijine pohuadeni assire ocasserani ahuajaro. Pina pohuadeni nepemimanajari, pohuadeni ime nabiqueramanajari. Naraha najaro poccadeni marinajapi ibodi tobicanijine pajira-jerani. Tabaccora tanicca tohuini inajarocca inajicanijine pajira-jerani.

3

Memehujicca ima tohuira tiquinaji

¹ Aji tiadenipi Cristodsa jehe tiquinapodsama ticcadeni imabote tinebomanadsapi pina Cristo dsoqquedsa nahatonijarissa tiquinajaropaji. Cristo pohua tedseje tinahatonimanadsapi memehujaji aji Cristocca ima tohuira tiquinaji. Nahi memehujajipa Cristo Imehi Dio inori nahatonihuaji huittaritari, Pohua tedseje dodossesse najari. ² Nani memehujicca ima tohuira tibodideni huatomanehe timadimanaji. Aji namicca ima tohuipi tetideni huatomana-jeraji. ³ Tiadenipi pina aja Cristo pohua huatiajarissa tiquinajaro, ajijaro namicca denima tohuini tiquinejeranijine. Ticcadeni camittehe dsatipi Cristodsa

anijaro. Diona tiadenidsa ecahuajaro. ⁴ Ticcadeni camittehe dsati jinedepa Cristo pohuana paja. Nidsa pohua ccanipomadsapa pohua dsibehinema, pocca deni tojehema ccanihitohui. Tiadeni naqui pohuadsa jidsera tani-manapomanitohui. Nadsapi pocca deni tojehe tiadenidsa tojajaropi ahuateo tanitohui.

icca madie jadanicca ima, icca madie dsaticca ima

⁵ Ajijaro namicca ima aji tohuini tiquinanicca tiadenidsa aniraha tinajicamanaji. Maqquidejedeni, jidapapi amoneje onihi aja ajapi tinebomanaji. Aja dsabisso tabiradeni naco dsohuato ticaji-jerajaro aja ajapi tinebomanaji. Amoneje tiadeni naqui maqqui ticajimanaraha maqquideje ohuaha naja najapi tinebomanaji. Huananehe denima oppina tanicca naqui tinebomanaji. Aji tiadeni tohuini tiquinanicca tohui tiadeni dosse dosse nejeranijine tinebomanaji. Aji ima tabaccora tajaro tohuini tibodideni huahuatoma najaro naqui tinebomanaji. Madija dsepetaji qqui tiquinadsa naqui tohuini tiquinejeraji. Madijacca tarabaiadsa bica tanicca acconi naqui tedimana tejeraji. Nadsama aji dsiniro, todsepetaji huemani ticajimanadsa tetidsemanajaropi pina madija Dio pajissaccadsa huatidsemana-jaradsa pohuadeni cacahuade pohuamaccadsa huahuatidsemana najarissa tiquinarana. ⁶ Ajijaro namicca ima nema najarojinena Diocca huadie bacco nanitohui. Nidsa Dio Attidsa iboqquri najaridenidsana najidsohue oppina tanicca ssonarinitohui. ⁷ Tiadeni naqui Jesodsa jehe tiquinejeraccadsapi ajijaro namicca imadsa timadimanaccade. Ticcadeni madie jadani pina Dio Attidsa iboqquri najaridenicca madiessa tinanamanaccade. ⁸ Naraha jidapapi ima tabaccora

tajaro huapima tinebomanaji. Huadie tinebomanaji. Madija tinajidsobaquimana tajarajo. Madijadsa ima tinanamananijine naqui huatimana tiquinejeraji. Madija tamasso tamasso naqui tinebomanaji. Ima bica tejeranicca jidsehe naqui tinebomanaji. ⁹ Madija ohuaha tedseje maidsa maidsa ticanaridsera tejeraji. Nani aji ticcadeni madie jadani tinebomanadsapi pina aji eterobote coro tiquinajarossa najaropaji. Jicajaro. ¹⁰ Aji tiadenidsa madie dsati tojajaropi pina etero dsati tedsamanajarossa najaropaji. Nadsama aji tinahatomani-manadsapi Jesocristocca camittehe, pocca dacorehe tiadenidsa tojadsanapojaropaji. Najarojinea aji tiadeni Nahatode Diodsa tichattera tichattera dsanapodsapi aja tiadenidsa tojidsera-dsanapojaripaja, Dio Puhuassa tiquinanijine.

¹¹ Jidapapi Jesocristocca madiedsa tiquejenajaro, tibodideni dsati tojadsapi aja madija ohuaha ohuaha inaridsaraha Jesocristodsa ijariqquinissa tajaropaji. Jehe, aji tijariqquijaro motapa jodio quejena-jarajari, motapa jodiodeni Cristodsa toquejenajari. Motapa huissinaja caji-manajari, motapa huissinaja cappiramanajari. Motapa dsama onihicca madija, motapa ssamoqquri najarideni. Motapa tarabidsajine medse toquejenajarideni, motapa medse toquejena-jarajarideni. Huapimapa Cristodsa toquejenaridsajaripaja. Puhuana ima huapimadsa deni tojajari. Puhuapa ia huapimadsa aniridsajari.

¹² Dio tiadeni tocattejidساباqquijaripa pocca madija bicaqquri tiquinanijine. Diopa tiadenidsa huati huana tajari. Nema nadsapi tiadeni naqui madijadsa tetideni huanaqquri nadsa acco acco titicamabaquimana najo. Bicaqquri tiquinadsa ima bicanira titinanamana naji. — Ohuana deni ojani — tiquinejeraji. Joneqquri tiquinadsa madijadsa catidseqquri tiquinaji. Tidsepedeni ijjarocca

najo tadsa naqui nebomana tejeraji. Madija mari ticana-manadsa naco tohuatta-jaradsapa tedimana-jeradsa mohuaradsa mari ticanamanapomana, onajaro. ¹³ Madijajine tiadenidsa bica tejeranicca inanamanadsapi mohuaradsa tinahanamanaji. Tedimana-jeradsa: —Tijinedeni ohuadsa bica tejeraraha epeje ohuati ajimani —titiquina naji. Pohuadenidsa tijinedeni bica tejeradsa naqui nama quinadsana bica tani. Pina ia Medsede ticcadeni imasiridsa: —Epeje, ohuati ajimani —najarissa tiquinaji, onajaro.

¹⁴ Tohuati huanehema timadimanaji. Ima bicani huapi taraha tohuati huanehena deni tojajaro. Eti cahanerara canadsana Cristodsa ijariquuinissa tajaro. ¹⁵ Cristocca jonehe tibodidenidsa deni tojana. Najaro jonehema timecotedeni tedseje timadiridsa-manaji. Nema tiquinanijine Dio titohuideni huahua najari, pina Jesocristo pohua assire ojarjarissa tiquinanijine. Nema nadsapi Dio Pohuadsa naqui: —Jehe, tijine iadsa bica tani —titiquina naji.

¹⁶ Jesocristocca marinaja bicabote tibodidenidsa madi-dsanapona. Aji tiadeni huapima Diocca tohuattemahema titessedeni tedseje ahuaji mari, ahuaji mari ticanabaquimana najo. Diocca tohuattemahema naqui titessedeni tedseje ahuaji nahatidse, ahuaji nahatidse titiquina naji. Diodsa tetidsemanadsa naqui jiri jiri titiquina naji. Aji Dabicca jijiricca jiri jiri titiquina naji. Aji Dio Atti dsodo nanicca jijiri tojanidsa naqui jiri jiri titiquina naji. Dio Corimejine jijiri ticanahatomanadsa naqui jiri jiri titiquina naji. Jiri jiri titiquina nadsa naqui tibodideni: —Jehe Abi Dio, epejeni. Ticca daniji iadsa bica tani —titiquina naji. ¹⁷ Nadsama aji Jesocristodsa tiquejenajaro huati huati tiquinadsa naqui ima tibodideni tinajoramanadsapi: —Ohuapi Jesocristocca ojani, ima bicandisara huati huati onana —titiquina naji. Tidsepedeni

ijimanadsa naqui pina ia Medsede Jesodsa tidsepedeni ijiridsamanajarossa tiquinana. Ticcadeni madie naqui ia Medsede Jeso onima timadiridsa-manaji. Tidsepedeni ijimanadsa, huati huati tiquinadsa naqui Jesocristo pohua onima Abi Diodsa: —Jehe, epejeni. Tijine iadsa bica tani —titiquina naji.

Jesocristodsa tiquejenajaropi ticcadeni madijadenidsa ajima tiquinadsana bica tajaro

¹⁸ Amoneje maqquideje ticajimanajarodeni, ticcadeni maqqui attidsa iboraqqiri tiquinaji. Nani aji Jesocristodsa tiquejenanicca ima tijinedeni ahuato tani-jine. ¹⁹ Maqquideje amoneje ticajimanajarodeni, tiadeni naqui ticcadeni amonejedsa tettideni huanaqqiri naji. Ticcadeni amonejedsa tettideni ocassera tejeraji. Johua ticanamana tejeraji, onajaro.

²⁰ Ejedenideni, tiadeni naqui ticcadeni abi, ami attidenidsa iboraqqiri tiquinaji. Nahi ia Medsede huatid-sehijine. ²¹ Nadsama abi, ami tiadeni naqui ticcadeni ejedeni tijinedeni huadimana-jarana. Tijinedeni huadimanadsapa tettidenidsa paja tohuibomanarihi narana.

²² Tarabidsajine medse tiquejenajaro, tiadeni naqui tiadeni dossede ajijaro namidsa madijari attidsa iboraqqiri tiquinaji. Tarabidsa najo tanicca tiadeni tocadossebaqqidsa naqui pohua attidsa iboraqqiri tiquinaji. Tiadeni dossede qqui tadsa, qqui tajaradsa naco tidsepedeni ijimananissa taji. Pohuadeni atti: —Jehe, tijine bica tani —quinahijine tohuini tiquinani ojari-jerana. Dio noppine naqui ticappinamanadsa tibodideni maidsera tadsa tidsepedeni ihijimana naji. ²³ Tidsepedeni ijiridsamanadsa naqui madijadsa tidsepedeni ijiraha pina ia Medsededsa tidsepedeni ijimanajarossa najaro. Nadsapi tettideni ajima tiquinaji: —Cristodsa jehe onadsapi ojine bica tana, onajaro —titiquina naji. Tidsepedeni

ijimananissa tadsapi ia Medsede tinahatidsemanahijine.
²⁴ Ia Medsede Cristopa tiadeni Dossedede pajissa deni to-
 jahicca. Puhuadsa tidsepedeni ijimanajaro manaconi
 tiadenidsa tojanijine nahatoqquiri tiquinani. Najaroa
 aji nidsa memehuaji bacco tiquinadsapi Diocca daniji
 bicani huati tapojaricca tiadenidsa da inaridsanitohui.
²⁵ Naraha tabaccorehe inanamanajarodenipa poccadeni
 tabaccorehe manaconi pohuadenidsa tojanitohui. Ojari-
 adsa itide, pamahadsa itide huati tohuanahi najarahito-
 hui. Pocca najidsohue huapimadsa pajiranissa tanitohui.

4

¹ Nadsama dodossededeni, tiadeni naqui ticcadeni
 dodosse tabaqquidenicca tarabadsa manaconi
 pohuadenidsa da tiquinanissa taji. Aja pohuadeni
 tarabadsa quinahijine oppina tanicca, ssamo
 tanicca naqui dossemana tiquinejeraji. Tetideni
 ajimamana tejeraji: Tiadeni naqui tiadeni Dossedepa
 memehuaji madihi. Nidsa dsotode najari pohuadsa
 tecomeramanitohui.

² Nadsama tiadeni huapimapi Diodsa huatide disser-
 aqquiri tiquinaji. Huatide tiquejenadsa naqui ima onihi-
 tohui tibodideni huatomana tejeraji. Dio Puhuadsa naqui:
 —Jehe, epejeni. Ticca daniji iadsa bica tani —titiquina
 naji. ³ Itohui naqui Diodsa huati huati tiquinaji, nahi
 Puhajine madija bodideni najoramanapodsapa: —Jari,
 iadsa Jesocristo tahimari tecomeramanaji —quinahijine.
 Nani Jesocristo tahimari icassiejeranijinecca mari ican-
 abaqquihijine, inajaro. Najaro ima tahide ahuatora tapo-
 raha jidapana iadsa tohuatojaro. Najaro ima ohuacom-
 erajarojine toponi cocorodsa ohuedsajaropaji. ⁴ Dio Atti

ecomeradsa madija mittamanahissa tahijinena bica tajarō. Nadsama Jesocristo tahimari ohuacomeradsa ojine ahuatō tanijine naqui Diodsa huati huati titiquina naji.

⁵ Diodsa jehe quina-jarajarideni tedseje bacco ticaniredsapi tibodideni huatonissa tadsa pohuadenidsa bicaqqiri tiquinaji. Pohuadenidsa Dio Atti huati tiquinanijine tinajomana tejeraji. —Jidapana pohuadenidsa Jeso tahimari huati onana —tiquinaji. ⁶ Aja Diodsa jehe quina-jarajarideni tedseje imahaha ticanadsa naqui tettideni bica tadsa pohuadenidsa huati huati titiquina naji, nahi Jesocristo tahimari tohui quinahijine. Tiadenidsa: —¿Jesocristocca imapi nejecoma najarona paji? —quinadsa naqui tibodideni najoradsa tettideni bica tadsa pohuadenidsa tetecomeramana naji.

Pablo pohua tessedeni nija naridsamanajari

⁷ Imecote Tiquico pohuadsa eti huana tajarō. Najarina tiadenihuaji dosse onadsa otahimari tiadenidsa huati tahitohui. Pohuapa obiji accode bica tade. Pohua tedseje ia Medsededsa idsepe ijjarode. ⁸ Pohuapa tiadenihuaji dosse onajari, itahimari tiadenidsa huati tahijine. Pohua naco tiadeni tonahatidsebaquihitohui. ⁹ Imecote bica tajari Onesimo naco Tiquico tedseje tiadenihuaji tohuedahitohui. Onesimopa Jesocristodsa dissera tajari. Pohuapa titiqueriquimana nahihuajicca madija. Aji imadinihuajicca ima nemanehē tiadenidsa huati toquinahitohui.

¹⁰ Nadsama aja otesse Aristacopa tiadenidsa nija nahi. Pohuapa ohua tedseje toponi cocorodsa ibedsajaro. Bernabecca madija Maraco naco tiadenidsa nija nahi. Aji Maraco tahimari timittamanapojaropi nidsa tiadenihuaji toccadsapa tinamadimanahissa tana. ¹¹ Aja otesse Jeso, oni ohuahapa Justo, najari naco tiadenidsa nija nahi.

Najaridenipa jodiodeni Jesocristodsa toquejenajari. Pohuadenipa ohuadsama Diocca cacahuehe tahimarini tojaridsanijine idsepe ijiridsajarode. Pohuadenipa obodi oji naraha ohuati inassonamanajarode. Naraha aja jodio Jesocristodsa toquejenajarideni motapa ohua tedseje dsepedeni ijimana-jarade.

¹² Otesse Epaфра naco tiadenidsa nija nahi. Pohuapa Jesocristodsa ibora tadsapa pocca dossenijidsa dsepe ijijari. Aja Epaфра nahi Jesocristodsa titiqueriquimana nahihuaajicca ahuaji ccajonajari. Titohuideni Diodsa huatide dissera tajari. Ticcadeni jeheniji Jesocristodsa pajiranissa tanijine nadsa Diodsa huati huati dsadsanapo najari. Jesocristodsa jehe tiquinani todacorani nanijine naco Diodsa huati huati dsadsanapo najari. Dio Pohua jipa tahiccadsa, pocca dossenijidsa iboraquiri tiquinanijine naco Diodsa huati huati dsadsanapo najari. ¹³ Ohuapi Epafracca ima nahato onadsa tiadenidsa huati onajaro. Pohuapa titohuideni bodi huatohua madijari. Aja odsa panani Laodiseahuajicca Jesocristodsa toquejenajarideni tohui, aja odsa panani Hieraporihuaajicca tohuideni naco bodi huatohua madijari. ¹⁴ Roca naco tiadenidsa nija nahi. Pohuapa icca jemedsi cacahuadeja najari, pohuadsa eti huanaquiri najaro. Dema naco tiadenidsa nija nahi.

¹⁵ Nadsama ohuatti naqui aja imecotedeni Laodiseahuajicca Jesocristodsa toquejenajaridenidsa naqui nija onajaro. Nipadsa naqui nija onajaro. Nipacca odsahuaji Jesocristodsa quequeriquimana najaridenidsa naco nija onajaro. ¹⁶ Ajijaro occa ima teppe hua tiquinehe jicadsapi aja Laodiseahuaji Jesocristodsa quequeriquimana najaridenidsa da tiquima-manana, onajaro. Aji occa ima teppe onihi Laodiseahuaji dosse onapojaro naqui nanidsa hua quinehe jicadsapi aji timadimanani Corosahuaji bacco tadsapi hua tiquinana, onajaro. ¹⁷ Nadsama ime-

cote Ariquipodsa naqui huati tiquinana: —Ia Medsede Dio tia cadossedsapa najarossa tinanaji. Dissera tinaji —tiquinana, onajaro.

¹⁸ Ohuapi Pablo ajijaro ima teppe jicaniccana ohua odsepedsa dsodo onajaro. Tiadenidsa nija onajaro. Jehe, tetideni ajima tejerana, ohuapi toponi cocoro todsimadsa ohuedsaccani. Ohuapi tiadenidsa ohuati huana tadsapi ohuattipi: Diocca biquehe tiadenidsa tojadsanapona, onajaro.

Epejeni, ohua onipi Pablo.

El Nuevo Testamento en el idioma Culina (mádiya) del
Perú

Kulina: El Nuevo Testamento en el idioma Culina (mádiya) del Perú
New Testament

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 30 Nov
2021

4c7c82dd-1f0f-5341-b6e6-26970c27fee2